

Ilidža, 16.02.2010.godine

Broj:62/10

**ZAPISNIK I ZAKLJUČCI SA SEDME SJEDNICE  
PREDSJEDNIŠTVA SKUPŠTINE SAVEZA OPĆINA I GRADOVA  
FEDERACIJE BOSNE I HERCEGOVINE**

Na Ilidži je dana 16.02.2010. godine održana Sedma sjednica Predsjedništva Saveza općina i gradova Federacije Bosne i Hercegovine (u daljem tekstu: Savez).

Sjednici Predsjedništva Saveza prisustvovalo je **10** članova, i to:

1. g-din Husejin Smajlović, načelnik, Općina Zenica,
2. g-din Ermin Hajder, načelnik, Općina Bosanski Petrovac,
3. g-din Hasan Ajkunić, načelnik, Općina Bugojno,
4. g-din Muhamed Ramović, načelnik, Općina Goražde,
5. g-din Amer Čenanović, načelnik, Općina Ilidža,
6. g-din Rasim Omerović, načelnik, Općina Kalesija,
7. g-din Luka Čelan, načelnik, Općina Livno,
8. g-din Vlado Alilović, načelnik, Općina Vitze,
9. g-din Hamdija Osmić, načelnik, Općina Zavidovići, i
10. gđa Dragana Solaković, pomoćnik Gradonačelnika, Grad Sarajevo,

Pored gore navedenih, sjednici su prisustvovali i: g-din Ivo Jerkić, načelnik, Općina Čitluk, g-din Hamdo Ejubović, načelnik, Općina Hadžići, g-din Mensur Jašarspahić, načelnik, Općina Kakanj, g-din Alija Tihjić, direktor Federalne uprave civilne zaštite, g-din Željko Obradović, direktor Federalne uprave za geodetske i imovinsko-pravne poslove, g-din Nedžad Pašalić, pomoćnik direktora Federalne uprave za geodetske i imovinsko-pravne poslove, g-din Aziz Klisura, savjetnik, Federalno ministarstvo poljoprivrede, vodoprivrede i šumarstva, g-din Jure Sesar, pomoćnik ministra Federalno ministarstvo poljoprivrede, vodoprivrede i šumarstva, g-din Omer Pašalić, direktor, Federalna uprava za šumarstvo, gđa Drita Haziraj, «Naša relanost», g-din Denis Zaimović, «Naša realnost, gđa Edina Ičindić, šef odsjeka za informisanje, Općina Ilidža, gđa Vesna Travljanin, Direktorica Saveza, gđa Selma Fišek, saradnik za pravna pitanja, gđa Zlata Turkić, saradnik za rad sa komisijama i institucijama vlasti, g-din Edin Demirović, saradnik za lokalnu samoupravu, g-din Amir Kupusija, viši saradnik za odnose s javnošću, i gđica Šejla Hasić, viši saradnik za projekte.

G-din Smajlović pozdravlja prisutne, otvara sjednicu Predsjedništva i predlaže Dnevni red.

Gđa Solaković predlaže da se pod tačkom 4. uvrsti i Inicijativa Grada Sarajeva, podrška Rezoluciji o smanjivanju nuklearnog oružja.

G-din Jerkić predlaže da se pod tačkom 4. uvrste i dvije inicijative iz Općine Čitluk. Inicijativa o sastanku sa Federalnim ministrom financija povodom MMF aranžmana i Inicijativa Izmjena i dopuna zakona o pripadnosti javnih prihoda.

**Jednoglasno je usvojen Dnevni red sa predloženim dodatnim tačkama.**

1. Usvajanje Zapisnika i Zaključaka sa Šeste sjednice Predsjedništva  
**Zapisnik i Zaključci sa Šeste sjednice Predsjedništva su jednoglasno usvojeni.**
2. Prijedlog aktivnosti Saveza u vezi sa posljedicama uzrokovanim obilnim poplavama u općinama u Federaciji BiH

G-din Smajlović predstavlja g-dina Tihića, direktora Federalne uprave civilne zaštite.

G-din Tihić zahvaljuje prisutnim. Konstatuje sa žaljenjem da je sistem civilne zaštite važan samo kada se nešto desi. Smatra da je bolje raditi na prevenciji nego reagovati tek kada se nešto i desi. Smatra da su sve situacije podnošljive dok nema gubitka života, te smatra svojom primarnom misijom da se zaštite građani. Konstatuje da načelnici imaju veliku odgovornost po pitanju civilne zaštite. Općine moraju usvojiti općinski plan civilne zaštite, predložiti razvoj i organizaciju svoje službe i osnovati centar kako bi se zadovoljio minimum sredstava. Federalna uprava civilne zaštite je poslala preporuke općinama za obezbjeđivanje sredstava posebne namjene, a koja se mogu koristiti samo u ovu svrhu. Općina koja ne zadovolji dvije Odluke vlade koje su već dostavljene općinama, neće se moći kvalifikovati za dodatna sredstva u slučaju nepogoda. G-din Tihić informiše prisutne da ima u planu obići sve kantone i općine radi promoviranja prevencije, kao i dodatne podrške.

G-din Jašarspahić konstatuje da je u posljednjih nekoliko godina u Općini Kakanj poplava i klizišta čija sanacija prevazilazi nekoliko miliona maraka. Općina je uputila inicijativu Federalnoj upravi civilne zaštite, ali su dobili negativan odgovor za dodatnu pomoć, iako su zadovoljeni svi kriteriji od strane općine. Također postavlja pitanje šta će se desiti kada se poplave smire. Pomoć nije ni tada dostupna. Poziva gospodina Tihića da posjeti Kakanj.

G-din Tihić konstatuje da je Kakanj dobio pomoć po pitanju klizišta, i još jednom naglašava da nema pomoći bez zadovoljenih procedura, te da se one moraju poštovati.

G-din Alilović se javlja za riječ kako bi komentarisao izlaganje g-dina Tihića. Konstatuje da se on lično tokom poplava osjećao jadno. Na televiziji je data izjava da je sve riješeno i da nema problema, a voda je sve poplavila i ništa nije riješeno. Odvojena sredstva od strane općine su toliko mala da se ništa ne može konkretno uraditi na sanaciji problema.

G-din Čenanović pozdravlja prisutne. Konstatuje da je Ilidža najugroženija općina po pitanju poplava, te da je Općina Ilidža imala velikih problema. Smatra da se sistemski mora pristupiti problemu. Kao prvo da se prije komentara na televiziji moraju posjetiti općine i vidjeti stvarno stanje na terenu. G-din Čenanović naglašava da je problem također i u samom zakonu.

Naime, sredstava nije dovoljno, odvojeno je nekih 20% posto, a to bi trebalo da bude najmanje 50% sredstava i da se ta sredstva usmjere na preventivu. Trenutno se sredstva troše nenamjenski. U sarajevskom kantonu Uprava civilne zaštite je dobila najmanje pet miliona maraka od vodne naknade, i ta se sredstva ne troše namjenski.

G-din Tihić podržava ideju g-dina Čenanovića. Konstatuje da postoji i zaključak Vlade, da Federalno ministarstvo zaduženo za energetiku napravi prijedlog prevencije stanja do marta mjeseca tekuće godine. Cijela suština je ulaganje u prevenciju.

G-din Ajukunić smatra da ne treba puno polemisati, i konstatuje da plavni val zahvati općine svake godine. Konstatuje da nema adekvatne razmjene informacija sa višim nivoima vlasti, kao i drugih institucija kao što su institucije zadužene za puteve, vodoprivredu, itd. Poziva sve da dođu u lokalne zajednice.

**G-din Smajlović zahvaljuje na raspravi, i konstatuje da je informacija primljena k znanju.**

### 3. Zakonodavne aktivnosti Saveza:

#### 3.1. Konsultovanje Saveza na tekst Zakona o premjeru i katastru nekretnina i na nacrt Zakona o izmjenama i dopunama Zakona o zemljišnim knjigama Federacije BiH

- Izvještaj sa sjednice Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša

G-din Jašarspahić pozdravalja sve prisutne. Informiše članove Predjedništva o održanoj sjednici Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša. Konstatuje da su članovi Komisije bili u dilemi da li je predloženi Zakon o premjeru i katastru nekretnina u formi Prijedloga ili Nacrta. Također, postavljeno je niz pitanja oko budućeg sistema geodeta, te da li će obaveze i dužnosti istih riješiti nekim drugim podzakonskim aktima. Stav Komisije je da se sva ova i druga postavljena pitanja trebaju jasnije razraditi. Također, članove Komisije interesuje da li će ovlaštene geodete biti dodatni trošak građanima. Komisija je mišljenja da je razdvojenost grunta od katastra loša solucija. Stav Komisije je da je ovo veoma široka oblast i da je dosta šturo uređena u ovom Prijedlogu ili Nacrtu zakona. Zaključak Komisije je da se formira radna grupa iz ove oblasti koja bi ponudila nova zakonska rješenja. Nakon toga predlažu sastanak sa gospodinom Obradovićem kako bi se dva teksta usaglasila.

G-din Obradović pozdravlja prisutne i zahvaljuje se na mogućnosti da prisustvuje sjednici Predsjedništva. Konstatuje da je Zakonom iz 2003. godine došlo do problema na terenu. Potrebno je usaglašavanje zakona i svima je poznato kako je to bilo ranije. Rješenje je da se uradi paket zakona, uključujući i Zakon o stvarnim pravima. Ovo je tek početak. Zamisao i jeste da zemljišne knjige i katastar idu zajedno. Sve promjene vode ka tome. Objasnjava trenutnu situaciju i stanje i da je to nemoguće uraditi odjednom. Jedno od rješenja je i uvođenje ovlaštenog geodeta. To nije funkcija kao što je notarska funkcija, te da usluge neće poskupiti. Mjesta za amandmane ima.

G-din Pašalić pozdravlja prisutne. Konstatuje da je bio jedan od članova Komisije formirane po zaključku oba Doma parlamenta. Informiše prisutne da je zakon u formi prijedloga bio u parlamentarnoj proceduri. Oba Doma su ga poslala nazad na doradu. Zaključeno je da Komisiju čine predstavnici Federalnog ministarstva pravde i Geodetske uprave. Tako je i urađeno. U Komisiju je bilo uključeno još šest predstavnika zakonodavne vlasti. Kao odgovor na sugestiju o jedinstvenoj evidenciji slaže se sa prijedlogom, ali također naglašava da je šest članova bilo protiv, te se nije moglo napraviti takvo rješenje. Međutim, ostavljena je mogućnost da direktor i predstavnik Federalnog ministarstva pravde potpišu procedure i Pravilnik o zajedničkoj uspostavi katastra i zemljišne knjige. Ovaj Zakon je plod kompromisa i daleko je usaglašeniji nego sadašnji. Smatra da je ovlašteni geodeta dobar potez i da će malo više srediti stanje na terenu. Komisija je spremna na amandmansko djelovanje. Predlaže da se sastanu članovi Komisije Saveza, zajedno sa Federalnom upravom za geodetske i imovinsko-pravne poslove, i sa Federalnim ministarstvom pravde kako bi se razjasnile neke stvari. S njihove strane potrebni su im argumenti.

Gđa Turkić konstatuje da je zaključak Parlamenta bio da se uključi i Savez.

G-din Obradović konstatuje da u Zapisniku tako nije navedeno.

G-din Smajlović podržava ideju da se napravi jedan zajednički sastanak i da se dođe do rješenja.

**Prijedlog je jednoglasno usvojen.**

### 3.2. Prednacrt Zakona o šumama

G-din Omerović pozdravlja prisutne. Podsjeća prisutne da je Komisija koju čine predstavnici Saveza općina i gradova Federacije i Federalnog ministarstva poljoprivrede, vodoprivrede i šumarstva, zajednički radilo na usklađivanju dva moguća prijedloga Zakona o šumama. Naglašava da su ostala neusaglašena samo dva člana (član 51. i član 65 prednacrt

Zakona o šumama). Međutim, Ministarstvo je ponudilo prednacrt Zakona bez našeg učešća, iako je na sastanku Komisije dogovoreno da idu obje verzije prednacrt Zakona o šumama. Konstatuje da je Federalno ministarstvo poslalo prednacrt svog zakona i tražilo odgovor u roku od 24 sata, te smatra da je takvo ponašanje neozbiljno od strane Federalnog ministarstva poljoprivrede, vodoprivrede i šumarstva. Ministarstvo je ponudilo svoj prijedlog sa kojim se predstavnici Saveza nisu složili. G-din Omerović konstatuje da mu nije jasno zašto Ministarstvo odbija organizaciju samostalne Uprave na Federalnom nivou. I danas su ta dva člana sporna. G-din Omerović konstatuje da je on taj koji je insistirao da se pozovu predstavnici Ministarstva na sjednicu Saveza kako bi se još jednom pokušali dogovoriti. Komisija je htjela da pretekne Ministarstvo i da predloži svoj prednacrt zakona. Zahvaljuje predstavnicima ministarstva što prisustvuju sjednici.

G-din Pašalić konstatuje da se nije nadao da će se razgovarati o ovim članovima. Stav Ministarstva je da se opredijelio za kantone, jer su se sve općine pripremile za formiranje preduzeća, te smatra da bi to bilo previše, i da to ne bi prošlo u parlamentarnoj proceduri.

G-din Hajder izražava želju da malo pojasni situaciju sa gledišta lokalne samouprave. Smatra da su trenutno šume najbolji prostor za kriminal, te da vlada opšta konfuzija oko šuma i šumskog zemljišta. Razumije da je nepotrebno osnivanje previše preduzeća, ali da trenutni monopolistički odnos uništava privredu. Način odnosa i gazdovanja šumom je pogrešan, te da je neophodno ukinuti sadašnji monopol. Ovaj problem će kulminirati i neće biti moguće riješiti ga. Predlaže da lokalne zajednice budu partneri upravljanja ovim resursom na svim nivoima.

G-din Omerović dodaje da je tu i pitanje implementacije zakona. Smatra da su za to zadužene Federalne i kantonalne vlasti. Već osam godina se zakon ne implementira.

G-din Smajlović konstatuje da je važno naći zajedničko rješenje kako bi prednacrt zakona išao u proceduru. Stav struke je da je samo jedno preduzeće zaduženo i to je pravo rješenje. Naravno, uzeći u obzir političku volju. Stav struke je da nećemo bolje upravljati razjedinjeni. Predlaže da se usaglase stavovi.

G-din Ejubović smatra da se prednacrt ovog Zakona razmatra i na Komisiji za ekonomski razvoj, uzimajući u obzir i ovo što je rekao g-din Hajder o ekonomskom razvoju. Ovdje se mora naći odgovor i mora se riješiti problem.

G-din Jašarspahić smatra da se isti prednacrt treba proslijediti i **njegovoj Komisiji**.

G-din Klisura se slaže da stanje jeste alarmantno. Konstatuje da se može svesti na nivo lokalne zajednice jer član 51. prednacrt Zakona to dozvoljava.

G-din Ajkunić konstatuje da je, što se tiče Općine Bugojno, problem na kantonalnom nivou.

G-din Klisura konstatuje da su Sarajevo šume samo korisnici šuma, a vlasnik je Federacije, te da postoje problemi poslovanja. Ovo treba amandmanski riješiti, pa neka parlament odluči.

G-din Hajder konstatuje da općina ima šumu, te da zakon predstavlja problem, i da općina želi prava koja joj i pripadaju.

**G-din Smajlović konstatuje u ime Predsjedništva da Komisija Saveza i dalje radi ono što smatra da je potrebno, kao stručno tijelo Saveza, a da Federalno ministarstvo šalje svoj Prednacrt kako smatra da treba.**

### 3.3. Rezultati provedene ankete o primjeni zakona o poljoprivrednom zemljištu i naredne aktivnosti

Gđa Fišek pozdravlja prisutne. Podsjeća Predsjedništvo da je na Petoj sjednici Predsjedništva usvojena zaključak da se nadležnom ministarstvu uputi Inicijativa za donošenje podzakonskih propisa u vezi sa Zakonom o poljoprivrednom zemljištu. Stručna služba je sprovela anketu u općinama, te je prosljedila dopis Federalnom ministarstvu poljoprivrede, vodoprivrede i šumarstva, dok je pokretač inicijative, Općina Doboju-Jug dobio odgovor u formi dopisa od nadležnog kantonalnog ministarstva.

G-din Smajlović predlaže da se trenutno po tom pitanju ne poduzimaju aktivnosti, jer je Općina Doboju-jug, kao pokretač inicijative dobila odgovor.

**Prijedlog je jednoglasno usvojen.**

## 4. Inicijative:

### 4.1. Općine Lukavac za donošenje Zakona o komunalnim taksama na nivou Federacije BiH

G-din Hamdo Ejubović – Predsjednik Komisije za ekonomski razvoj općina i gradova i finansije konstatuje da su članovi Komisije razmijenili niz e-mailova oko Inicijative o komunalnim taksama na području Federacije Bosne i Hercegovine, te zauzeli stav da se podrži ova Inicijativa. Smatra da bi bilo potrebno donijeti zakon na Federalnom nivou.

**Inicijativa je usvojena.**

#### 4.2. Općine Travnik za izmjenu i dopunu Zakona o ugostiteljskoj djelatnosti

Općina Travnik u svojoj Inicijativi traži pooštrene mjere za ugostiteljstvo i kršenje zakona o javnom redu i miru.

**Inicijativa je usvojena.**

#### - Izvještaj sa sjednice Komisije za ekonomski razvoj općina i gradova i finansije

Gđa Jasmina Đikić pozdravlja prisutne. Izvještava Predsjedništvo o aktivnostima oko analize Federalnog kontnog plana i na koji način kontni plan utiče na rad lokalnih zajednica. Konstatuje da je napravljen obiman materijal i da su dati prijedlozi za doradu kontnog plana. Smatra da Federalni kontni plan ima dosta problema. Nova zakonodavna rješenja ne prate izmjene kontnog plana. Kao primjer navodi Zakon o građevinskom zemljištu gdje su izmjene kontnog plana urađene naknadno, tek 2008. godine. Ne prati se zakonska regulativa.

Kroz komentare se predlaže otvaranje još konta kako bi načelnici jasno znali čime raspolažu. Drugi problem je pitanje kapitalnih investicija i rashoda. Problem predstavlja takozvana kategorija gdje su zajedno stavljeni i kapitalni prihodi i rashodi. To je jedinstven primjer u praksi i stvara problem.

Gđa Đikić navodi i niz drugih problema koji su ustanovljeni kroz analizu. Smatra da je Inicijativa Općine Lukavac dobra i da možda i uštedi troškove sudskih procesa.

Tokom analize predstavnici Federalnog ministarstva finansija su u nekoliko navrata imali sastanke sa predstavnicima Saveza općina i gradova FBiH, i sa njihove strane postoji volja da se svi prijedlozi koji dođu iz Saveza uvažavaju.

**Prijedlog je jednoglasno podržan.**

#### 4.3. Inicijativa Grada Sarajeva o potpisivanju Rezolucije o ukidanju nuklearnog naoružanja

G-din Miroslav Živanović pozdravlja prisutne. Kratko informiše članove Predsjedništva da je Grad Sarajevo član Međunarodne asocijacije gradova nosilaca poruke mira. Ova Asocijacija je usvojila Rezoluciju o ukidanju nuklearnog oružja. G-din Živanović sugerira članovima Predsjedništva da podrže ovu Inicijativu koju je usvojilo Gradsko vijeće Grada Sarajeva.

**Inicijativa je jednoglasno podržana.**

#### 4.4. Inicijativa Općine Čitluk – Aranžman sa MMF-om

G-din Ivo Jerkić izvještava Predsjedništvo da je u proteklih nekoliko sedmica, na Inicijativu općine Čitluk, Stručna služba Saveza prosljedila upit svim općinama o

zainteresovanosti općina za korištenje sredstava iz MMF-a ukoliko bi ta sredstva bila dostupna. Na osnovu zaprimljenih odgovora očigledno je da je većina općina zainteresovana. G-din Jerkić također izvještava Predsjedništvo da je Stručna služba Saveza zaprimila dopis od načelnika Osmana Čehajića, Općina Ključ, u kojem se traži sastanak sa Premijerom g-dinom Mustafom Mujezinovićem i ministrom finansija Federacije Bosne i Hercegovine, g-dinom Vjekoslavom Bevandom, kao i sa predstavnicima MMF-a. Na osnovu svih podataka sugeriše se da se ponovno pokuša organizovati sastanak sa gore navedenim predstavnicima viših nivoa vlasti.

**Jednoglasno se podržava prijedlog da Stručna služba Saveza organizuje sastanak sa Premijerom, ministrom finansija FBiH i imenovanom delegacijom Saveza.**

4.5. Inicijativa o Zakonu o izmjenama zakona o pripadnosti javnih prihoda u Federaciji Bosne i Hercegovine.

G-din Jerkić, kao pokretač Inicijative ukratko izvještava Predsjedništvo o razlozima za predlaganje izmjena. Naime porez na dohodak se primjenjuje od 1.1.2009 godine i obuhvata nekadašnji porez na plaću i poreze građana. Svi prihodi izuzev poreza na dohodak dijeljeni su u većini kantona u omjeru 50% katnonu a 50% općinama. Omjer poreza na dohodak je 65,64% kantonu a samo 34,46% općinama. Da je omjer jednak, općine bi imale između 3-5% veće proračune. Stoga, g-din Jerkić predlaže da se ide sa Prijedlogom zakona koji je dostavljen u materijalima i to po skraćenom postupku.

**Prijedlog je jednoglasno usvojen.**

5. Prezentacija Prijedloga projekta «Humana općina/humani grad»

Izjesticilac: predstavnici Projekta «Naša realnost»

Gđa Drita Haziraj pozdravlja prisutne. Ukratko predstavlja zamisao projekta «Humana općina/humani grad». Konstatuje da postoji velika gledanost i podrška iz dijaspore. Misija projekta je rješavati probleme socijalno ugroženih sistemski. Važna je podrška općina.

Gđa Travljanin konstatuje da su se predstavnici Projekta «Naša realnost» sastali sa predstavnicima Saveza u nekoliko navrata, te predlaže da Predsjedništvo da suglasnost za dalji rad.

G-din Ajkunić konstatuje da ima pozitivno iskustvo sa ovim projektom, i da su ovakvi projekti dobrodošli. Ne želi ulaziti u detalje saradnje. Predlaže da Stručna služba zajedno sa predstavnicima «Naše realnosti» razrade akcioni plan te da se onda prezentira Predsjedništvu.



G-din Hajder podržava g-dina Ajukunića. Konstatuje također da je imao pozitivno iskustvo sa ovim projektom, te da je neophodno prezentirati nešto formalno i konkretno prije nego se da saglasnost.

**Prijedlog g-dina Ajukinića je jednoglasno usvojen.**

6. Informacije o:

6.1. organizaciji Skupštine i Sajma NALAS-a u Sarajevu u martu 2011. godine

Gđa Travljanin izvještava Predsjedništvo o usvojenoj Inicijativi Saveza općina i gradova Federacije Bosne i Hercegovina na Skupštini NALAS-a da se u martu 2011. godine u Sarajevu održi Sajam općina i gradova jugoistočne Evrope. Predlaže da Predsjedništvo podrži ovu aktivnost koja će još više ojačati ulogu Saveza na međunarodnoj sceni.

**Informacija je jednoglasno usvojena.**

6.2. projektu sa SIDA-om (Švedska agencija za razvoj)

Gđa Travljanin izvještava članove Predsjedništva da je tokom druge polovine 2009. godine održan niz sastanaka sa predstavnicima SIDA-e gdje se diskutovalo o mogućnosti projekta jačanja kapaciteta Saveza. Na osnovu radnih sastanaka i uvida u rad Saveza napravljen je prijedlog trogodišnjeg projekta za direktno jačanje kapaciteta Saveza. Važno je naglasiti da bi ovaj projekat, poslije MA(S)CIPa, implementiranog od strane VNG-International-a, bio prvi projekat koji bi direktno uložio sredstva u daljnje jačanje kapaciteta i ljudskih resursa Saveza općina i gradova FBiH. Nadalje, gđa Travljanin predlaže članovima Predsjedništva da daju suglasnost za zvaničan početak projekta.

**Prijedlog je jednoglasno usvojen.**

6.3. Imenovanje članova Radne grupe za izradu Strategije za obuku u jedinicama lokalne samouprave

Gđa Fišek izvještava članove Predsjedništva da je Stručna služba Saveza prosljedila dopis svim općinama za prijedlog članova Radne grupe za izradu Strategije za obuku uposlenika u jedinicama lokalne samouprave, projektu koji UNDP implementira u suradnji sa Savezom. Sugerira Predsjedništvu da imenuju članove Radne grupe iz liste prijavljenih kandidata.

**Jednoglasno je usvojeno da su:**

1. članovi Radne grupe ispred Saveza općina i gradova FBiH, gđa Vesna Travljanin i g-din Miroslav Lucić (predsjednik Komisije za razvoj i unapređenje lokalne samouprave), i
2. članovi Radne grupe ispred općina Federacije Bosne i Hercegovine: g-din Muhamed Ramović, načelnik Općine Goražde, g-din Nisvet Hrnjić, načelnik Općine Jajce, g-din Fadil Imšriović, načelnik Općine Gradačac i g-din Predrag Šupljeglav, načelnik odjela za opću upravu i društvene djelatnosti, Grad Mostar.

6.4. održanom Seminaru «Upravljanje ljudskim resursima i obuka u jedinicama lokalne samouprave u Federaciji BiH»

Gđa Fišek ukratko izvještava prisutne o održanom seminaru o upravljanju ljudskim resursima gdje su prisustvovali predstavnici Saveza općina i gradova Federacije, kao i načelnici mnogi općina u Federaciji BiH.

**Informacija primljena k znanju.**

Izjavitelj: Selma Fišek, saradnik za pravna pitanja

6.5. održanom 3. sastanku Panel grupe PEP International (Projekat pomoći ruralnim područjima u općinama u Federaciji BiH)

G-din Samir Hajrulahović, koordinator projekta pozdravlja prisutne. Ukratko prezentira projekat i izvještava o poduzetim aktivnostima tokom 2009. godine. Naglašava da je cilj projekta jačanje komunikacije među lokalnim stanovništvom.

G-din Hajder čestita na dosadašnjoj implementaciji. Naglašava da ovaj projekat radi ono što bi općine trebale implementirati, a to je participarno učešće.

G-din Kupusija naglašava da je ovo dobra praksa koju bi trebalo proširiti i na druge općine.

**Informacija primljena k znanju uz podršku nastavku projekta.**

6.6. Beacon aktivnostima za 2010. godinu

G-din Kupusija izvještava članove da su dodijeljene nagrade za Beacon 2009. godine. Iz Federacije, ovaj status dobile su općine Tuzla, Čitluk i Bihać. Sredstva za nagrade obezbijedilo je Federalno ministarstvo pravde. Općine sa Beacon statusom imaju obavezu širenja dobrih praksi i na druge općine. Trenutno se pripremaju aktivnosti za pet krug Beacon Scheme.

**Informacija primljena k znanju.**

6.7. Donošenje Odluke o sazivanju sjednice Skupštine Saveza u skladu sa članom 20. Statuta Saveza općina i gradova Federacije BiH («Službene novine FBiH», broj: 29/08)

Gđa Travljanin izvještava Predsjedništvo da je neophodno sazvati godišnju Skupštinu Saveza općina i gradova FBiH.

**Jednoglasno je zaključeno je da predsjedavajući Skupštine Saveza uz pomoć Stručne službe sve organizuje, te se daje ovlaštenje Stručnoj službi da izvrši sve potrebne pripreme.**

#### 7. Tekuća pitanja

- Gđa Travljanin informiše Predsjedništvo da je nekoliko općina samovoljno smanjilo iznos članarine, iako se članarina nije mijenjala u zadnje dvije godine, te da su ta sredstva neophodna za rad Stručne službe Saveza.

- Gđa Travljanin izvještava Predsjedništvo da je u drugoj polovini 2009. godine došlo do mogućnosti proširenja radnih prostorija Saveza na istoj adresi. Kao što je već poznato članovima Predsjedništva, trenutne prostorije Saveza ne zadovoljavaju potrebe broja uposlenika. Stoga je Stručna služba Saveza iznajmila prostorije.

**Informacija je primljena k znanju.**

Sedma sjednica Predsjedništva Saveza općina i gradova Federacije Bosne i Hercegovine završena je u 14:00 sati.

Zapisničar  
Šejla Hasić, s.r.

Predsjednik Predsjedništva Skupštine  
Husejin Smajlović, s.r.